

四庫全書

史部

欽定四庫全書

史部
吳越脩史卷三

詳校官監察御史_臣查瑩

檢討_臣德生覆勘

總校官庶吉士_臣倉聖脉
校對官中書_臣李斯咏

謄錄監生_臣譚世緯

欽定四庫全書

吳越備史卷三

宋 錢儼 撰

文穆王

文穆王諱元瓘字明寶武肅王第七子也母晉國昭懿太夫人陳氏唐光啟三年丁未冬十一月十有二日生於杭州之東院先是有胡僧持一玉羊大數寸光彩異常獻武肅王且曰得此當生貴子王果以丁未生焉乾寧元年二月授鹽鐵發運巡官奏授金部郎中賜金紫天復

元年八月改授禮部尚書遙領邵州刺史九月壬子王祖妣秦國太夫人水丘氏薨二年徐綰許再思搆宣城觀察使田頔同劄我壘頔敗率綰再思回宣州慮我師逐之乃懇求質武肅王厯選諸子不應命時王尚幼請行莊穆夫人聞之泣曰置我兒於虎口也王曰亡身以紓家國之難亦足以報劬勞耳雖死無恨乃再拜而出武肅王奇而送之王自北門躡繩梯而下以赴頔營比及宣城而頔叛於淮帥淮師會我師以攻之頔每戰不

勝歸必求王將肆其毒顧母老且賢常加保護天祐元年十月我師與淮人攻之甚急顧將出戰乃曰今日不勝必殺錢郎其母目而送之且曰鼠輩死不旋踵矣是日果陷於宛水橋為亂兵所殺賊衆尚擾我師提顧首示之賊衆遁散顧母遂奉王至我師衛而歸焉二年春正月制授王檢校右僕射八月處州刺史盧約弟佶寇永嘉開平元年正月武肅王命王伐永嘉四月斬盧佶而還

時盧侏列巨舟四十艘於清澳海門以邀我師王謂
諸將曰賊之銳卒盡在此矣宜勿與戰當由他道徑
襲賊壘出其不意必成擒也於是由安固江登陸而
襲之侏由是就執

師還承制改王內衙都指揮使檢校尚書右僕射冬十
月授王金紫光祿大夫檢校司空五年秋七月賜王號
贊正安國功臣進授司徒守湖州刺史乾化三年夏四
月淮將前吉州刺史李濤率兵二萬自千秋嶺寇我衣

錦軍命王率師討之王以山谷迂僻乃盡伐樹木絕其歸路為三覆以待之時江南國主徐知誥在賊中與王騎相逼幾獲之俄而知誥易服乘白騾而竄壬辰獲李濤及偏將咸知進等八千餘人兵甲生口稱是

是行也王營中有氣如龍虎之狀賊中望之曰此霸者之氣也

五月命王復率騎兵攻宣州廣德縣城未拔有登城詬辱我師王怒奮擊之六月己卯城陷王手刃二百餘人

藉藁而行獲淮將花虔渴信及吏卒七十餘人而還

先是有日者視王曰公手刃百人當大貴時又有僧
名自新常衣紙住廣德山院王至衆皆遁而自新歸
然晏坐軍中有詰其不去者新曰前後左右皆兵耳
去將安適時王在衆中新忽見之乃斂衣奉迎與語
久之及王還遂載而歸後王問自新當時何以見識
新曰微僧無他術但觀王在萬衆中骨法獨異與咸
通皇帝御容頗相類故幸得一識耳

冬十月勅授王檢校太保依前湖州刺史大彭縣開國男食邑三百戶四年夏六月制授王特進光祿大夫開國侯食邑一千戶秋九月命王率師攻常州無錫縣丁未克之獲其將朱超等五百餘人而還貞明元年春正月勅授王鎮海軍節度使土客諸軍都指揮使湖州刺史如故三年夏六月制加王檢校太傅增食邑五百戶五年春三月命王率水師大小戰艦五百餘艘皆刻龍形自東洲發艦遙趨淮甸夏四月乙巳大戰淮人於狼

山江將戰之夕王召指揮使張從寶計之曰彼若徑下
當避其初以誘之制勝之道也乃命軍中宿理帆檣每
舟必載石灰黑豆江沙以隨焉翌日昧爽淮人果乘風
自西北而下危檣巨艦勢若雲合我師皆避之賊舟既
高且巨不能復上我師反乘風以逐之復用小舟圍其
左右賊迴舟而鬪因揚石灰賊不能視及軸轆相接乃
撒豆於賊舟我舟則沙焉戰血既漬踐豆者靡不顛踣
命進火油焚之

火油得之海南大食國以鐵筒發之水沃其焰彌盛
武肅王以銀飾其筒口脫為賊中所得必剝銀而棄
其筒則火油不為賊所有也

斬其將百勝軍使彭彥章獲士卒七千餘人賊船四百
餘艘餘皆焚之其斬馘之甚自江及岍數十里皆殷焉
淮師自是遂求通聘

是行也舟次狼山江之石碑灣有石幢大署其文曰
向後有木龍五百至此

秋七月王復戰於毗陵之無錫縣偏將曹筠奔於賊我師不利王騎逼高岸賊將追及乃舉策私誓曰天必助我馬當躍上不然則墜我於此馬果一躍而登岍既而復整行伍破賊而還冬十一月丁亥王妣吳越國莊穆夫人薨六年冬十月勅遣衛尉卿無通事舍人陳琮授王檢校太尉同中書門下平章事充清海軍節度使餘如故龍德二年春正月勅王特進檢校太尉兼侍中加食邑三百戶仍賜匡扶定亂立正至道功臣同光二年

冬十月制授王開府儀同三司檢校太師兼中書令依
前清海軍節度使兼充兩浙節度使觀察留後遣進奉
使婁輯將命焉天成元年四月武肅王至自衣錦軍而
中外無所專命武肅王嘉歎久之九月制加王食邑一
千戶實封一百戶

一夕王夢神人賁骨一副易王之頂門及醒尚微疼
焉

三年春二月遣閣門通事舍人李韞授王鎮海鎮東等

軍節度使杭州越州大都督長史加食邑一千戶實封二百戶秋七月己巳忠獻王生

初武肅王將屬王以冢嗣乃命諸子有功者數人謂曰爾無隱情各言爾功以定厥後王兄中吳軍節度使元璫王弟清海軍節度使元璿寧國軍節度使傳璟洎諸公子等皆上言功德高茂是宜委副故以兩鎮屬焉及武肅寢疾一日命出玉帶五賜王兄弟命王先擇之王乃取其狹小者武肅王大悅謂王曰吾

有汝瞑目無恨矣

四年秋八月己酉今大元帥吳越國王弘俶生五年夏五月制加王食邑一千戶實封一百戶

壬辰長興三年春三月己酉大雪二十八日庚戌武肅王薨王哀慟終日四日不食左右勸以粥夏四月己未王即位悉用藩服之儀從治命也赦境內一應荒絕田產尚隸租籍者悉免之中外班賚有差

自今年孟春洎是月陰晦彌時至是澄霽中外咸悅

是月庚午奉武肅王靈輜殯於衣錦軍之正寢秋八月
楚師馬希聲殂弟希範嗣

癸巳四年春正月福州王延鈞僭稱帝更名璘三月勅遣
將作監李錯光祿少卿張哀來歸我先王之賻又遣引
進使楊彥珣授王起復雲麾將軍上金吾衛大將軍員
外置同正員王兄中吳軍節度使元璩檢校太師兼中
書令王弟清海軍節度使元璿檢校太傅同中書門下
平章事餘如故夏四月淮南僞客省使許確百濟國太

僕卿李仁旭各來祭我先王秋七月勅遣郎中張絢授
王中書令進封為吳王是月番禺偽左僕射何瑱亦來
祭我先王九月勅遣侍郎張文寶來宣諭

文寶泛海而來被風壞船飄至天長吳王厚禮之及
賞從者錢帛等數萬文寶獨受飲食餘皆辭之吳王
嘉之竟抵杭

冬十一月明宗崩宋王從厚即位是為閔帝十二月庚
戌寧國軍節度使同平章事檢校太傅王兄元璣卒

璣王之庶兄也母慶安夫人胡氏公性氣寬厚沉靜
寡言多尚儒釋不喜奢侈歷官數年黎庶安樂早失
夫人終不繼娶嗣之

是歲順化軍節度使判明州王弟元珣召歸錢塘懲虐
政也

甲午應順元年春正月閔帝改元大赦勅遣鞍轡庫使王
延縞來宣告仍賜國信尋又遣散騎常侍孔昭序駕部
員外郎張縡冊王為吳越王是月大雪平地五尺壬午

奉葬先王於茅山閏月蜀帥孟知祥僭稱大蜀皇帝年
號明德夏四月潞王從珂率兵入洛逐閔帝而自立改
元清泰六月勅遣給事中張延雍兵部員外郎馬義冊
王為吳越王秋七月偽蜀孟知祥殂子昶嗣

乙未清泰二年春三月制授靜海軍節度檢校太保中書
令王弟元球守太師秋七月甲辰西方慶雲見重建開
元宮追福於先王也

丙申三年春正月勅遣禮部尚書李懌戶部郎中姚遐賚

奉吳越王金印至歸舊物也秋七月勅建先王廟於東府是月制授王部將保順軍節度使鮑君福檢校太尉同平章事冬十月偽閩王昶殺其父延鈞而自立年號通文閏十一月契丹立石敬瑭為晉皇帝於洛大赦改元天福潞王自殺十二月勅授王天下兵馬副元帥

丁天福二年春正月朔日有蝕之勅遣供奉官周彥瓌賜國信二月淮南以徐知誥為齊王建國於金陵是月己酉夜暴雨自西北起連日至壬子有海魚二各長五

十餘尺一死於桐廬一死於餘姚江三月靜海軍節度使王弟元球順化軍節度使王弟元珣並有罪命死王許以公禮葬其麾下卒伍悉宥之

元球元珣數有軍功先王賜有兵杖及王立元球等恃恩驕橫增置兵杖諸將吏告元球遣親信禱神求王吳越又為蠟丸與元珣議謀王不信諸將復告王乃召元球元珣宴後宮既至左右告元球等有刃於懷袖即皆格殺之王欲按諸將有交通者姪仁俊諫

曰昔光武破王郎曹公破袁紹皆焚其書疏以安反側宜效之王乃止

夏四月勅遣禮部尚書程遜兵部員外郎韋稅封王為吳越國王仍賜天下兵馬副元帥金印甲午王即位建國之儀一如光故事仍赦境內今年租稅之半是月晉主遷都於汴秋七月制削元球元珣在身官爵任便處置八月辛巳王大閱於北郊是月偽吳楊氏遜位於徐知誥戊申王新建五廟於城南九月乙卯王親視五

廟冬十月乙丑金陵徐知誥僭稱大齊皇帝年號昇元
戊戌三年春正月朔日有蝕之二月乙亥丞相沈崧卒

崧字吉甫閩人也祖輅大理評事賜緋父超福州長
溪縣令崧初生時有大蛇墜床前引首視之久而方
去既七日將浴忽風雨震壞浴盆乾寧二年刑部尚
書崔凝主禮闈凡二十五人登進士第渝濫尤衆昭
宗御武德殿命翰林學士陸扆秘書監馮渥親覆試
凡落十人是日崧再以章奏捷尋歸寧途由淮甸淮

帥辟之不就遂歸武肅厯鎮海軍掌書記授浙西營
田副使奏授秘書監檢校兵部尚書右僕射凡書檄
奏表多崧所出莊宗即位改元同光武肅王問其祚
修短崧曰觀此號為國不成止一口耳文穆王襲位
置擇能院以選士俾崧主之國建拜崧丞相終年七
十六諡文獻

冬十一月勅遣尚書左丞王延司門郎中張守素賁捧
吳越王玉冊及沿身法物等至

冊曰唯天福三年歲次戊戌十一月甲辰朔五日戊申皇帝若曰王者握圖立極崇德報功或開國以建邦或苴茅而錫壤乃樹藩屏式獎忠勲古先哲王率由斯道惟朕薄德敢忽彝章況夫奠南服之奧區鎮東甌之重地懋績雖高於列土殊榮未繼於肯堂得不申加等之恩降非常之命用紀代天之業特頒鏤玉之文乃擇吉辰爰敷盛典咨爾興邦保運崇德忠道功臣天下兵馬副元帥鎮海鎮東等軍節度浙江

東西等使開府儀同三司檢校太師守中書令杭州
越州大都督府長史上柱國吳越國王食邑一萬五
千戶實封一千五百戶錢元瓘嶽靈稟粹天象儲精
蘊文武之無材受乾坤之間氣既寵承吳越功邁桓
文運妙略以平克用奇兵而制變祇嗣構基表率英
雄淮夷之屏氣銷聲海嶠之波澄浪息而沉興我昌
運竭乃忠規懋勲庸而首列韓壇奉玉帛而誠先禹
貢語尊獎則獨標大節願封崇則未稱鴻名宜舉徽

章俾奉先正矧其天文當南斗之分地志控勾踐之
都眷茲舊封允屬全德是用異車服於羣后盛簡冊
於列藩正二國之土疆錫九天之寶瑞表於嘉命纘
乃舊邦大振家聲奕輔王室今遣使大中大夫尚書
右丞上柱國賜紫金魚袋張守素持節備禮冊爾為
吳越國王於戲服袞衣而佩玄玉位壓於諸侯駕戎
輅而握兵符名尊於九伐馭貴之重象賢之榮爾其
祗荷天光勉清國步往綏厥位永孚於休戒之慎之

勿忒前烈

十二月大閱馬步軍泊艘艫於碧波亭

己巳四年春二月勅授世子弘傳為果州團練使是月偽齊徐知誥改姓李更名昇僭稱大唐

昇本潘氏湖州安吉縣人父為安吉砦將嘗因淮將李神福侵我吳興據潘氏而去昇遂為神福家奴徐溫嘗造神福家見而異之求為養子至是乃隱本族而冒徐姓焉後嘗致書於我以毘陵求易吳興仍引

枋田為說則本潘氏明矣

秋七月朔日有蝕之閩王延義更名曦弑其主昶而自立年號永隆八月戊申建世子府於城北是日白龍見處州長松縣遂更為龍泉縣九月詔陞婺州為武勝軍授王兄元懿為節度使是月保大軍節度使同叅相府事陸仁章卒冬十月壬子吳越國莊睦夫人馬氏薨

夫人臨安人父綽淮浙行軍司馬雄武軍節度使同平章事夫人性聰慧勤於職初武肅王禁中外母得

蓄聲妓夫人以王胤嗣未立乃請於武肅王王嘉之
曰我家宗祀幸汝得主之矣因許王納妾遂生忠獻
王諸子既長夫人皆均養之常置銀席於帳前坐諸
公子於上夫人閱其聚戲喜動顏色初封越國至吳
越國夫人薨年五十勅諡曰恭穆

是月勅遣刑部尚書李懌禮部郎中崔鈞授王天下兵
馬元帥增食邑五千戶實封五百戶仍賜御服紅羅真
珠戰袍金鎖甲各一副十二月辛酉葬恭穆夫人於衣

錦軍慶僊鄉

庚子五年春二月甲辰溫州刺史王子弘僎卒己酉閩王
曦遣兵擊其弟王延政於建州遂僭稱大殷皇帝王命
內衙統軍使仰詮都監使薛萬鍾帥師伐建州三月勅
陞婺州為武勝軍又陞嘉興縣為秀州以嘉興崇德華
亭三縣隸焉壬申勅遣右諫議大夫高延賞兵部郎中
李元龜授王天下兵馬都元帥夏四月癸卯鎮海軍行
軍司馬無侍中同平章事太尉鮑君福卒

君福字慶臣餘姚縣人祖興父璨俱不仕少羈貧性
淳厚有膽勇餘姚有井面廣丈餘君福每恣卧其上
而無畏色鄉黨異之及從軍以驍果稱初仕鄞漢宏
及武肅王東討乃與其黨歸降號曰向盟都累從征
伐有功能馬上雙劍入陣望之若飛電沉默少語軍
中謂之鮑閑尋為衢州應援指揮使屬刺史陳璋叛
淮人入其境乃以淮帥命辟為郡職君福不納武肅
聞之慮其被害乃密賜絹書使苟從之因與賊徒李

元嗣飲伺其醉乃奔歸尋授衢州刺史淮將信州刺史周本屢侵其境君福每率數騎往逐之本遁去及將罷郡武肅王勞曰比在任戰敵而已未足為副使優賀之道因復任之凡三考文穆王領清海軍節制辟為副使後遷湖州復二考累職鎮海軍節度副使浙西行營司馬奏授登州刺史保大保順等軍節度使檢校太尉同平章事兼侍中年七十七諡曰忠壯是月甲子世子弘傳薨

弘傳王第五子也母魯國夫人卨氏時王年將四十
冢嗣未建及生特所鍾愛累奏授兩浙副大使果州
團練使國建立為世子初王治世子府謠言曰何處
有庶脯將薨乃題所居屏障曰四月二十九日大會
羣仙凡題數處及期果薨年方十六歲追諡曰孝獻
五月四星聚斗秋七月我師敗於建陽積雨乏糧故也
八月以世子府為瑤臺院冬十二月以忠獻王為內衙
諸軍都指揮使是歲姑蘇吳興嘉禾三郡大水

辛丑六年春三月丙寅勅遣太子賓客聶延祚吏部郎中
盧撰冊授王守尚書令夏五月番禺婁襲遣偽攝太尉
工部侍郎盧膺尚儀謝宜清尚衣高素清來逆我故王
弟傳璠之室馬氏以為繼室不克遣

馬氏即潭帥楚王殷之女也先是番禺亦聘馬氏既
卒遂求其弟是行也潭帥希範亦遣中軍使歐陽練
與廣使俱至馬氏誓不許故不克遣

六月寧國軍節度使同叅相府事仰詮卒秋七月甲戌

麗春院火延於內城王遷居瑶臺院是月閩王曦稱大
閩皇帝八月辛亥王薨於瑶臺院之綵雲堂年五十五
在位十年贈諡曰文穆勅宰相和凝撰神道碑七年壬
寅二月癸卯葬於國城龍山之南原王志量恢廓識度
宏遠雖少嬰軍旅尤尚儒學事武肅孝敬小心未嘗有
懈武肅性既嚴急每一召即時須至或巾帶於步驟間
乃置濶袴大襪以便之晚年政事一委叅決簿書填委
皆躬親批署手爲胼胝復置粉盤於卧榻之首夜有所

記必書其上詰旦以備顧問時屬重盜賊及詐偽誹謗
法犯者輒死王皆力救之所獲宥者甚衆嘗北征師次
平望蚊蚋尤甚左右請施帷帳王曰三軍皆在此我獨
何避竟不許及續嗣之後示以明恕人情翕然內衙指
揮使陸仁章婁仁杞等早備武肅王爪牙以性剛愎為
衆所惡而亦常以事侵王一日同列者皆率諸軍於國
門請王戮之王命姪仁俊諭之曰仁章等事先王有年
矣今求舊念功方當旌賞汝等遂以私憾使我戮之我

安可謂不報怨也苟不聽命我當歸臨安以避賢路衆皆退懼遂授仁章福州刺史仁杞湖州刺史中外有以封章相構者皆居中不下積而毀之王舅陳氏厯職不過一戍過每加厚賜而未嘗遷授恭穆夫人之弟馬充嘗以使役求免王廷責之遂下獄尋黜於剡溪其餘遵守治命保慎名器烈祖之風為不泯矣

一日武肅王寢疾召將吏曰吾疾必不起諸兒皆愚劣誰可為帥者諸將泣曰兩鎮令公仁孝有功孰不愛戴

武肅乃出印綸授王曰將吏推爾宜善守之又曰子孫
善事中國勿以易姓廢事大之禮王與兄弟同幄行喪
內衙指揮使陸仁章曰令公嗣先王霸業將吏旦暮趨
謁當與諸公子異處乃命主者更設一幄扶王居之禁
諸公子從者無得妄入武肅未薨時仁章常以事犯王
至是王勞之仁章曰先王在位仁章不知事令公今日
盡節令公猶事先王也王嘉之王以遺命去殊儀用藩
鎮法除民田荒絕者租稅王於兄弟甚厚兄元璫自蘇

州入見王以家人禮事之奉觴為壽曰此兄之位也而小弟居之是兄賜之也元璚曰先王擇賢而立之君臣位定當恭守霸業自為珍重王因相與泣

論曰王以英毅之姿兼仁厚之德入田頽豺狼之穴示亡身之慮破知誥蛇豕之羣揚對敵之威奮劒屢成大勲歷紐遂當慶嗣念功忘過崇德布政然後聿修先烈光紹世官天子賴於元勲諸侯奉為盟主以稱克家之令嗣以號列國之賢君則彤弓緇衣不足

侔其美也

忠獻王 忠遜王附

忠獻王諱弘佐字玄祐文穆王第六子也母吳越國仁惠夫人許氏王以天成三年七月二十六日己巳生於功臣堂初孝獻世子之居監撫也文穆王治其府於城北將俾居之一日孝獻會王以采戲於青史樓遽謂王曰君王方為我營府署今與爾賭之比及四擲而王遂得六赤孝獻失色從容曰五哥入府某當將符印之命

因再拜孝獻竟怒擲骰盆於樓下俄而孝獻薨王授兩軍節度副使檢校太傅天福六年秋八月諸將請誅內衙指揮使戴惲

惲乃王庶兄弘侑之親惲謀立弘侑故請誅之免弘侑為庶人復姓孫氏更名本罪異志也

是月王以遺命承制授兩軍節度使九月庚申王即位於僊居堂赦境內外頒賚有差及租稅等丞相曹仲達攝政事是月辛未王遷於思政堂命境內給復一年諸

關梁禁制悉從除減又命田園有隸道宮佛寺比入賦稅者悉免之冬十月長星見十一月金陵來祭我先王是月勅授王起復鎮國大將軍右金吾衛上將軍員外置同正員領鎮海鎮東等軍節度檢校太師兼中書令吳越國王食邑一萬戶實封一千戶仍賜保邦宣化忠正功臣是歲番禺劉龔殂子弘晟嗣

壬寅七年春正月閩人來祭我先王二月癸卯勅葬先王於龍山之南原三月勅遣使大中大夫李鸛來歸先王

之贈乙丑中吳建武等軍節度使廣陵郡王王世父元
璪殂子文奉嗣

元璪字德輝武肅王第四子也起家奏授沂王府咨
議叅軍宣武節度判官累遷散騎常侍賜金紫尋屬
軍旅事乃改授馬軍廳事指揮使天復二年徐綰叛
顧全武請奉王子之邾溝武肅以淮帥常請結姻好
乃遣元璪微服為全武僕而去比及望亭有逆旅媼
輒識之至潤州安仁義亦知其非常將以其下十人

易之全武懼因賂閹吏中宵而去及抵邳溝指陳逆順之理淮帥為之動容歎曰生子當如錢郎我之子狔犬耳即日遣使命顏還軍廣陵尋逆婦而歸後累征縉雲新定皆有功授邵州刺史尋征吳興高澧及攻東洲復授睦州刺史尋遷蘇州累勅授中吳建武等軍節度使蘇常潤等州團練使太傅同中書門下平章事侍中中書令在郡三十年性儉約而恭靖便弓馬文穆王即位以王兄尤加禮遇因元璪來覲為

酒授璚曰今日之事宜兄當之俾予小子至是實兄
推戴之力璚俯伏曰大王功德高茂先王擇賢立能
君臣之分敢忘忠順因相顧感泣久而益歡尋奏勅
封廣陵郡王封不及授宣命於柩前終年五十六葬
以王禮諡曰宣義

壬申制加王食邑七千戶仍改賜保邦宣化忠正翊戴
功臣夏四月漢主龔殂子玠立六月晉高祖崩少主重
貴即位秋七月王以內衙指揮使章德安李文慶為內

衙左右都監使冬十月以都指揮闕燾胡進思為內衙
左右統軍使十二月己巳以龍山武功堂為文穆王廟
癸卯八年春正月癸未重建功臣堂二月晉主還京是月
丙辰丞相皮光業卒

光業字文通世為襄陽人父日休有盛名為蘇州軍
事判官太常博士光業生於姑蘇十歲能屬文及長
以所業謁武肅累署浙西節度推官賜緋命入貢京
師梁後主特賜進士及第仍賜秘書郎授右補闕內

供奉賜金紫貞明中淮人來求好命光業聘之及還
贈錢三百萬復禁其出且曰可以市易光業曰我使
介也豈賈豎也乃委置而去淮人急載隨之梁主選
武肅子傳珍為駙馬都尉命光業如京師及回至靖
海光業舅氏滕文規為山陰令日暝遽見黃衣吏報
曰皮補闕今日已及靖海文規詰之遂失所在尋無
兩浙觀察使文穆即位命知東府事初光業旅遊會
稽有神降於里巷光業往視之神遂不語及去衆詰

之曰皮秀才來神何不語荅曰皮秀才此土地主我
小神不當見之至是果驗國建拜丞相凡教令儀注
多其所定光業美容儀善談論人或以為神仙中人
終年六十七贈諡曰貞敬

三月唐主昇殂子璟嗣年號保大閩王延政稱帝國號
殷是月漢彭城弘熙弒主玠而自立夏四月朔日有蝕之
秋七月王貶內衙都監使章德安於處州李文慶於睦
州冬十月勅遣使授王吳越國王王玉冊

冊曰惟天福八年歲次癸卯十月丙午朔六日辛亥
皇帝若曰在天成象拱辰分將相之星惟帝念功啟
土列侯王之國朕所以法昊穹而光宅稽典禮以疏
封而況世著大勲時推令器探寶符而嗣位杖金鉞
以宣威羽翼大朝藩籬東夏宜列諸侯之上特隆一
字之封簡自朕心叶於輿論咨爾保邦宣化忠正翊
戴功臣起復鎮國大將軍右金吾衛上將軍員外置
同正員檢校太師兼中書令杭州越州大都督充鎮

海鎮東等軍節度浙江東西等道管內觀察處置兼
兩浙鹽鐵制置發運營田等使上柱國吳越國王食
邑一萬七千戶實封四千戶錢某為時之瑞命世而
生負經文緯武之才蘊開物成務之志英華發外精
義入神亞夫繼社稷之勲顧榮擅東南之美眷言祖
考志奉國朝清吳越之土疆執桓文之弓矢天資厥
德代有其人荷基構以克家事梯航而述職殊庸斯
在信史有光是舉彝章爰行盛典土茅符節方推翼

世之賢黻冕輅車更重策勲之禮斯為異數允屬真
王今遣光祿大夫檢校司徒行太子賓客上柱國太
原縣開國男食邑三百戶王玫使副正議大夫行尚
書吏部郎中柱國賜紫金魚袋趙熙等持節備禮冊
爾為吳越國王於戲周寵元臣四履錫命漢封異姓
八國始王指河岳以誓功俾子孫而襲爵爾纂服舊
業朕考前文勿忘必復之言更廣無窮之祚懋昭前
烈爾惟欽哉

十一月辛巳王駕遷於功臣堂是月癸未丞相曹仲達卒

仲達臨平人也本名弘達避王名更之祖信知嘉興監事累贈司徒本歙州人尋歸杭州為臨平鎮將入都建時信因保嘉興東界遂家臨平焉父圭浙西道營田副使檢校太尉圭將生時信夢人謂曰我當為爾子有二千石信語夢於鄉黨鄉黨不能諭皆賀曰生此子必致豐稔圭有膽氣乾寧中淮人圍嘉禾圭

與其族人師魯守之賊中望氣者曰此雖孤城中有
貴人不可圖也圭每與師魯登樓張樂縱飲矢石交
至視之宴如也嘉禾平圭以功授蘇州刺史開平間
淮人復圍蘇州屬正月望夜師魯第盛陳燒燈之宴
賊之俘執者咸縱之觀圭終蘇州師魯形短而足跛
武肅常稱之曰今之晏平仲也人遂號爲曹晏嬰竟
卒於鎮東軍都押衙仲達初生室有紫光少時圭常
節其衣食雖嚴冬尚未挾纊品饍悉與僕隸等又日

令運甓圭在姑蘇時與仲達求婚於睦州陳詢及將
逆卜之曰陳是親必不就當聘他門由是榮貴既而
途由國城武肅王見而奇之乃以王妹儷焉累授台
處二州刺史文穆即位居諒闇命仲達權知政事國
建拜丞相今王即位復攝政事時大賚中外諸軍軍
中有言不均者輒舉仗不受賜諸將不能制仲達諭
之因皆釋仗而致謝仲達性淳厚好施與文穆尤重
之常止呼丞相而不名終年六十二贈諡曰安成

是月納元妃仰氏

寧國軍節度使同參相府事詮之女也

甲辰開運元年春正月壬寅丞相林鼎卒

鼎字渙文閩人也父無隱鼎生於明州大隱村初刺史黃晟頗好禮士無隱依之有詩名嘗爲詩云雪消二月江湖闊花發千山道路香知言者以無隱必有貴子鼎初謁武肅以爲觀察押衙推尋爲文穆王幕府文穆王以其才行累薦不見用一日復密薦之武

肅王曰我觀林鼎骨法真輔相器然我不貴者欲汝
貴之庶其盡心於汝也文穆襲國署鎮海軍掌書記
節度判官鼎性謹正而強記能書歐虞法比及中年
夜讀書每達曙所聚圖書悉由手抄其殘編蠹簡亦
手綴之無所厭倦國建乃掌教令尋拜丞相每政事
有不逮者鼎必極言之天福中建州之後鼎指陳天
文人事累疏切諫及師行果不利著文集行於世終
年五十四諡曰貞獻

三月僞閩王延曦爲其下指揮使朱文進所弑而文進自立復修貢於京師是月勅授王落起復增食邑三千戶夏四月丙午王親祀五廟秋七月辛未朔晉少主改元開運大赦是月以彭城知遠爲行營都統九月朔日有蝕之南船務石井有物形如守宮尾長七尺許鬣且角獲之置於安溪潭冬十一月王命從兄東府安撫使仁俊爲內外馬步都統軍使弟弘保爲東府安撫使閏十二月閩人殺朱文進尋以僧巖明爲主

巖明姓卓氏乃雪峰寺僧平素爲衆所重相與迎之
遂立爲帝

未幾爲其下李仁達所殺而自立歸歟金陵

乙巳開運二年春三月丙午王從祖順化軍節度使鐸卒

鐸字輔軒太師英顯王之第五子武肅王之少弟也

生而有文在其足曰王及長而滅既生而太師薨武

肅育之武肅薨鐸請服通喪性多藝尤精音律承制

累授溫明二州刺史檢校太尉奏授恩州防禦使文

穆時授兩浙行軍司馬拜命之日儀注特盛尋奏改
本州團練使順化軍節度使終年五十三諡曰忠簡
夏四月晉主還大梁秋七月修武肅王廟於城西奉梅
檀神像而致焉八月朔日有蝕之是月金陵遣將王建
封克建州虜王延政而歸冬十月勅遣太子賓客羅周
岳右庶子王延濟冊王守太尉十一月朔王大閱於北
郊是月誅內都監使杜昭達內衙都指揮使明州刺史
闕燔庶人孫本賜死貶都統使王兄仁俊本府安置

杜昭達闕燔皆好貨富人程昭悅以金寶交結二人
薦於王昭悅得侍左右愛特踰於舊將燔不能平昭
悅懼謀去燔燔專而愎國人皆惡之王亦惡之於是
昭悅出燔爲明州刺史右統軍使胡進思爲湖州刺
史燔謂進思曰出我是棄我也進思曰老兵得大州
幸矣何爲不行乃各受命既而復以他故留進思統
軍使王子仁俊母杜昭達之姑也昭悅因譖燔昭達
謀奉仁俊作亂下獄鍛鍊成之誅昭達與燔幽仁俊

於東府昭悅收仁俊故吏慎溫其使證仁俊之罪拷掠備至溫其堅守不屈王嘉之擢爲國官

丙午三年春二月朔日有蝕之三月勅授王東南面兵馬都元帥增食邑二千戶實封五百戶仍改賜推誠匡運忠亮威德功臣秋七月庚寅吳越國夫人許氏薨

夫人丹丘人也諱新月善音律文穆王後庭樂部皆命掌之初廊氏生孝獻世子後庭咸尊敬有尼契雲掌香火於麗春院之佛堂頗有知人之鑒視夫人曰

彼鄺氏者遠不能及至是果如其言王襲位勅封吳
越國夫人薨年四十四勅諡曰仁惠

八月重建天寵堂是月壬申葬仁惠夫人於國城西山
之原冬十月金陵攻福州節度使李弘義遣客將徐仁
宴李廷諤等求救於王

李弘義本名達殺卓巖明而歸款金陵金陵授之節
鉞仍編入屬籍更名弘義既而遣僞兵部侍郎陳覺
使於弘義覺還及建州又遣侍衛官碩忠以金陵僞

勅使之入覲弘義以其初不宣命至是方以書至不從覺乃與監軍使馮延魯自建州興師皆金陵之志也

是月王命統軍使張筠趙承泰等率水陸兵三萬人以救無諸

時福州乞師於王王召諸將議行諸將吏皆曰道路險遠難於師救內衙都監使水丘昭卷以爲當救王曰唇亡齒寒吾爲天下元帥曾不能救隣道將安用

之諸軍宜樂飽食安坐耶命水丘昭卷專掌用兵程
昭悅掌應援饋運而以軍謀委元昭德遣筠等率師
救之時王召左右議鑄鐵錢以益將士祿賜王弟弘
億諫曰鑄鐵錢有八害新錢既行舊錢皆流入隣國
一也可用於吾國不可用於他國則商賈不行百貨
不通二也銅禁至嚴民猶盜鑄况家有鐻釜野有鐸
犁犯法必多三也閩人鑄鐵錢而亂亡不足爲法四
也國用幸豐而自示空乏五也祿賜有常而無故益

之以啟無厭之心六也法變而弊不可遽復七也錢者國姓易之不祥八也王深嘉之乃止是行也宿衛衣錦軍武肅王廟庭者聞甲馬號令之聲凡數夕而止及接戰閩淮人視王師周遍郊野人皆文餘蓋靈助也

十二月王命弟弘俱爲湖州刺史

丁未四年春正月契丹主入東京稱會同十年廢晉少主爲負義侯遷於契丹黃龍府二月庚午有雉集於玉華

樓辛未晉

彭城

知遠稱帝於河東國號大漢是爲高祖復

稱晉天福十二年己卯王誅內都監使程昭悅釋東府
仁俊罪三月庚寅今大元帥吳越國王出鎮丹丘戊戌
王遣將余安率水軍救福州大敗淮師獲其將都指揮
使楊匡業蔡遇等僞東南面行營都統王建封等走之
擒戮裨將孟堅等并餘黨二萬餘衆器械數十萬李弘
義歸附於我更名儒贇

初忠懿王之治閩城壘壁皆有錢文曰此城終歸錢

氏忠懿頗惡之因命剗去而錢文愈明又謠曰風吹楊葉鼓山下不得錢郎戈不罷至是皆驗是行也金陵歸罪於陳覺馮延魯謂其專命而行也金陵始以覺爲東南面招討使延魯爲監軍及其敗績反以專命爲罪以贖恥一何偷哉爲君而偷復歸於下其喪師也不亦宜乎

夏四月李儒贊遣弟儒賓來請入覲從之五月我師凱旋王饗將帥於光冊堂賞賚有差是月勅授王諸道兵

馬都元帥增食邑五千戶實封五百戶仍改賜資忠緯
武恭懿翊戴功臣是月楚王希範殂弟希廣嗣六月乙
卯王薨於咸寧院之西堂年二十在位七年勅諡曰忠
獻八月勅葬龍山之西原王英明果斷權變不測初嗣
位尚少溫柔好禮恭勤政務發摘姦伏人不敢欺諸校
驕恣者能優容之及被譴皆不知覺兵籍使錢丞德家
火俯通內城命親軍援之王登而望有伺便攘竊者亟
命斬之衆因悉力火遂滅淮人之攻閩也李儒贊來求

援諸將議將不從王因集而詢之果同其說王變色曰
唇亡齒寒春秋明義吾爲天下元帥執大兵柄豈不能
恤隣難乎諸將躍馬肉食不能爲我身先耶有異議者
斬及大舉遣將誓師辭令明肅衆皆踴躍承命既而果
成大功開運中將蓋車徒乃下命募軍中及民間子弟
而踰時無應者乃命大糾之令曰糾而得之者糧賜皆
蠲半翌日投書者雨集遂加精訓南方之捷多其力也
民有獻嘉禾者王問倉吏蓄積幾何對曰十年王曰然

則軍食足矣可以寬我民乃命復其境內租稅三年


論曰王岐嶷之姿雖由天縱續嗣之日方屬妙年帑
藏因回祿之初將校競陸梁之志乃能恭勤庶務紹
開霸圖有果斷之名無酣嗜之累以致興復宮室開
拓土疆光有大功聿修厥德而享祚非永孰不哀哉
忠遜王諱弘侗文穆王第七子孝獻世子同母弟也起
家內衙指揮使檢校司空開運元年冬十一月出爲東
府安撫使累授檢校太尉尋拜丞相開運四年六月丙

寅卽位於天冊堂是月晉主入大梁改號曰漢秋七月
閩帥李孺贊來覲是月庚子有雉升於天冊堂之戟門
旋歷廊廡久而獲之閏七月王命李孺贊復任無諸王
親餞於碧波亭八月葬忠獻王於國城西原冬十月今
大元帥吳越國王至自丹丘十二月李孺贊復貳於我
王命東南面安撫使鮑修讓等攻討擒而戮之己酉傳
首國城是月命丞相吳程知福州威武軍事庚戌內衙
統軍使胡進思指揮使諸溫針滴等以內衙兵遷王於

義和後院諸將校率衆迎今大元帥即位焉自忠獻王時諸校驕慢雖旋加誅殛而在位者皆優饒遇之及王續嗣性既嚴急誅杭越侮法吏三人而統軍使胡進思恃迎立功干預政事王惡之每有僭越必顯責讓進思頗憂懼不自安屬內衙指揮使何承訓希旨請誅之又謀於都監使水丘昭券昭券以進思黨盛難制請於王且容之王猶豫未決承訓懼以謀告進思進思遂亂率親兵戎服入見王叱之不退猝愕入義和院進思鎖其

門矯稱王命告中外曰王猝得風疾傳位於某因帥諸將迎大元帥於私第且言於丞相元德昭德昭至立於簾下不拜曰俟見新君進思等亟出塞簾德昭乃拜進思稱王命承制授元帥元帥曰若全吾兄乃敢承命不然當避賢路進思許之元帥始視事於是進思殺水丘昭券進思妻曰他人可殺昭券正人君子也柰何殺之初遜王將即位近侍陳禹嘗夢以金鈔鑼承日輪加遜王之頂而手持二鑼未幾墜地既而以夢語人人曰汝

主將有非常之事然其二鏐不過二十句耳及即位又以黃金一鎰命近侍袁文昌鑄巨錢文昌意其求識且懼不就乃宿謀於匠者別鑄一以爲備翌日以所授金鑄之遜王臨視果不就因潛以宿鑄者獻至是皆驗其兆後廢王薨請諡曰忠遜以王禮葬會稽秦望山之原



吳越備史卷三

欽定四庫全書

史部
吳越脩史
補遺
卷四

詳校官監察御史

臣查瑩

檢討

臣

德生覆勘

總校官庶吉士

臣倉聖脉

校對官中書

臣李斯咏

謄錄監生

臣王爾熙

欽定四庫全書

吳越備史卷四

宋 錢儼 撰

大元帥吳越國王

王名俶字文德文穆王第九子也母吳越國恭懿太夫人吳氏王以天成四年歲己丑八月二十五日生於功臣堂天福四年十二月承制授內衙諸軍指揮使檢校司空忠獻王累授主特進檢校太尉開運四年春三月庚寅出鎮丹丘

即台州也

下車數月有僧德韶語王曰此地

非君為治之所當歸國城不然將不利矣王從其言即求歸秋九月甲戌發自丹丘歸覲也是日大風東南有雲如樓閣之狀識者異之冬十二月內衙統軍使胡進思指揮使諸溫斜泊等幽廢王於義和後院乃召諸大校及率中外軍庶奉迎王於南邸晡時王見府僚將校於帥府之外簾譙讓者三諸將校以王素有德望俯伏稱賀即日王以鎮海鎮東等軍節度檢校太尉兼侍中蒞事於元帥府之南序

戊乾祐元年春正月辛亥朔漢主南郊大赦改元是月
乙卯王即位於天寵堂赦境內租稅班賚有差

天寵堂即忠獻王重建逮於廢王不克遷徙至是而
王臨位焉

自前年季冬決於正旦陰晦彌月是日雲初澄霽中外
人情胥悅壬戌遣將兵奉廢王於衣錦軍丙子漢主崩
少主承祐即位二月辛卯王親祀五廟乙未誅內衙指
揮使何承訓懲其反覆中外大悅

初廢王將黜胡進思而承訓預其事議未決承訓反告於進思及王即位復請誅進思王懲其反覆立命斬之

三月勅遣中書舍人張誼來歸忠獻王賄丙寅內衙統軍使胡進思請誅廢王王不許於是進思憂懼而卒

先是王遣都頭薛溫領親兵保衛廢王且戒之曰爾等小心衛護吾兄若有異事當死拒之至是進思請誅不遂乃詐以王命令薛溫害之溫曰僕受命之日

不聞此言決不敢妄發也進思乃夜遣二賊踰垣而入欲刺廢王廢王闔戶大呼薛溫聞之率衆而入夜二鼓斃二賊於庭中至是進思聞二賊死憂懼不二日發疽而死

夏四月大閱馬步六月朔日有蝕之冬十一月下令以每歲租賦逋滯者悉蠲之仍歲為著令百姓歌舞焉
己酉二年春二月匡武都連名輒舉求職王命斬狀首二人坐黜者二十餘人餘宥之三月勅授王東南兵馬都

元帥鎮海鎮東等軍節度使浙江東西等道管內觀察
處置兼兩浙鹽鐵制置發運等使開府儀同三司檢校
太師兼中書令杭州越州大都督上柱國吳越國王食
邑一萬戶實封一千戶仍賜匡聖廣運同德保定功臣
夏四月太白晝見是月乙亥城西上清宮災五月內衙
指揮使斜滔以罪黜於處州六月甲申日有蝕之秋七
月朝廷命擒河中府李守貞

初守貞之叛求援金陵僞齊王景達舉兵應之未幾

守貞就擒淮人壓境而退

是月王命弟弘億為明州刺史冬十月勅遣散騎常侍張煦等持節備禮冊王為吳越國王仍賜玉冊金印法物等

冊曰惟乾祐二年歲次乙酉十月庚午朔十九日戊子皇帝若曰我先帝承有晉崩離之後醜虜充斥毒螫中夏是用順天致討大拯黎元太阿一揮胡馬宵遁享萬靈於無主解兆庶之倒懸較定世勲以吳越

居右伊朕眇末虔奉世訓嗣位之始即疇懋功前命
為元帥按地圖授武節東南之境得行征伐命勅為
真王駕大輅執桓圭牛斗之鄉盡荒土宇詢於有位
僉曰克諧咨爾匡聖廣運同德保定功臣東南面兵
馬都元帥鎮海鎮東等軍節度使浙江東西等道管
內觀察處置兼兩浙鹽鐵制置發運營田等使開府
儀同三司檢校太師兼中書令杭州越州大都督上
柱國吳越國王食邑一萬戶實封一千戶錢某象緯

炳靈公王襲慶橫江負海者三千里開國承家者六十年而能望辰極以駿奔奉天朝之師律充庭納貢則外府告盈下瀨宣威則前茅獻捷忠信著於羣后禮讓行於一方故玄冕九章為王之服昭其名也朱輪駟馬為王之馭昭其器也而又三吳百越列土分疆有民人焉有社稷焉恢祖禰之令圖實典禮之鉅著勸夫忠孝以御邦家今遣正議大夫守右散騎常侍上柱國賜紫金魚袋張煦左補闕崔頌持節備禮

冊爾為吳越國王於戲品秩甚尊名數尤重肅廣庭
而備物練吉日以覃恩爾其正厥位事大以敬教民
以順馭衆以恩神其福之禮曰惟王建國諸侯所以
守舊邦書曰惟帝念功王者於是出好爵匡我堯緒
永為漢藩浙江如帶稽山如礪福祿無窮貽厥百世
汝往欽哉對揚我休命

是月內衙指揮使諸溫以罪黜於溫州是歲下令以境
內田畝荒廢者縱民耕之公不加賦

時王募民墾荒田勿取其租稅由是境內並無棄田
或有請糾遺丁以增賦王命杖之國門民皆大悅

庚戌三年春二月金陵以偽永安軍節度使查文徽取福

州遣劔州刺史陳誨泉州刺史留從効率兵犯我無諸
王命指揮使潘審燔率師禦之遂生擒查文徽及行軍
判官楊文憲等三十餘人斬馘萬計陳誨留從効等走
之

初福人告查文徽曰吳越兵已棄城去請公為帥文

徽信之乃遣陳誨率水軍下閩江文徽自以步騎繼至城下閩州刺史吳誠詐遣兵數百出迎文徽誨諫曰閩人多詐未可圖也宜立寨徐徐圖之文徽曰疑則生變不若乘機據其城乃引兵徑進誨整衆鳴鼓還於江湄吳誠與潘審燭等勒兵擊賊大敗之遂執文徽等士卒戰溺死者一萬餘人陳誨等率親部而遁

是月甲午丞相中書令鄖國公杜建徽卒

建徽字延光新登縣人祖仲明不仕累贈水部員外郎父稜贊忠去偽功臣兩浙行軍司馬鎮海軍節度副使常潤二州刺史初入都建稜率鄉黨以武安為號時武肅王輔董庶人起石鏡鎮旋平彭城漢宏功業寢盛稜謂諸子曰吾每責人不過十罰則為之傷心而觀錢公每有斬決皆談笑自若成大事者是人也當事之必貴吾族稜遂歸於我光啟三年命征薛朗平之遂為常州尋遷潤州乾寧中安仁義適東陽命

稜率師討平之及武肅王以宣州降卒隸中軍號武
勇都前後左右皆無賴稜常患之乃密疏曰狼子野
心稜觀武勇將士終非大王所蓄願以士人代之武
肅王不聽及徐綰叛命使祭之旌其先見徽即稜子
也少強勇不與諸弟類嘗於山莊構小茆齋輒私署
軍州押衙紀於棟鄉里見焉驚因聞於稜稜亦加責
徽對曰大丈夫何止一軍事押衙耶始從軍無事人
之志及稜歸武肅王乃從父命而盡心於我稜在常

州為淮人所逼徽馳赴父難不及境而城已拔徽乃率所部還新登及稜自淮南歸軍中嚴整無改稜尤稱之徽累征伐皆單衣入陣賊衆無不披靡所至輒立大功軍中謂之虎子乾寧初從征董庶人被射中肩徽亦能軍開平中與武肅王弟鐸率師救姑蘇與敵遇因逼河河梁上斷乃鞭馬徑渡及岍馬斃遂瘞之號曰馬塚至今存焉徐綰之叛徽馳自新登以本部赴難因命守禦時賊將聚木焚北門徽使持火鉤

取其木先焚之遂不得聚賊計遂罷時有勸王東保
會稽徽按劔曰事苟不濟當同死於此必東渡亦售
命於賊耳武肅王納之睦州陳詢之貳我也王以徽
為詢姻婭頗疑之乃使馬綽伺其意徽曰陳氏負恩
背義自貽覆族之禍徽既姻婭義當見疑然累書以
諭之皇天后土苟或鑒照則拔城獲書方明徽心耳
俄有睦州廳吏來降持徽所遺書至武肅王嘉歎久
之賜徽錢一百萬徽兄建思嘗譖徽於武肅言其第

中蓄兵仗將為異圖王使人閱之徽方食使者強抵
徽卧內徽但食不顧使者聞之武肅王感悟益加殊
待及構第於城南王親與規畫徽性儉率出入導從
不過數人凡財物多散鄉里親族武肅王每會王人
必指之曰此杜丞相今日塵忝多其力也忠獻王時
其孫昭達為內衙都監使盛治第宅強徽觀之曰乳
臭兒不諳事乃爾後昭達果以罪誅及春秋高尚能
騎射嘗從擊毬於廣場興酣有宿中箭鏃自臂中飛

出人皆壯之徽為詩自叙曰中劒斫耳缺被箭射胛
過為將須有膽有膽即無價初稜將亡散家財與諸
子惟徽但授一笏稜曰此吾歷任所秉者唯汝能傳
之徽歷官自武安都將國子祭酒至涇源昭化等軍
節度使累官吳越國丞相兼中書令封鄖國公皆自
國初至忠獻王以來奏授也凡子弟孫姪多連姻公
室朱紫車馬充溢門庭有國以來莫比其盛卒年八
十八諡曰威烈

三月勅授王守尚書令增食邑二千戶實封五百戶夏四月王以查文徽等獻於五廟國人為之聳觀

先是征伐以來擒獲雖衆而獻俘之禮至是方備

是月丙午王親享五廟六月勅授王兄東府安撫使弘儼知福州威勝軍事秋七月戊寅命弟弘億為東府安撫使冬十月王歸查文徽於金陵十一月朔日有蝕之乙酉漢少主遇弑是歲潭帥馬希廣為其兄希萼所攻殺而自立臣於金陵金陵遣將邊鎬守之盡遷馬氏之

族於金陵是月漢太后臨朝

辛亥廣順元年春正月丁卯周太祖即位改元大赦漢太后遷居西宮三月勅授王諸道兵馬都元帥加食邑一千戶實封三百戶仍降尚書令冊禮夏四月王奉廢王居東府

即越州王築宮室治園圃花卉山石池塘亭苑奉廢王日娛悅之歲時供饋甚厚

夏六月丙午武勝清海等軍節度使王世父元懿薨以

其子仁倣嗣

元懿字秉徽武肅王第五子母李氏懿有燕頤之相
起家鎮海軍右直都知兵馬使尋授安國衣錦軍防
遏指揮使累授檢校兵部尚書懿性至孝而純直其
母嘗侍武肅王指令不稱旨被捶自是成疾每疾發
侍婢多厭倦惟懿不離左右雖糞溷亦親侍之常在
衣錦城出遊諸野遇菖蒲花尋收之新定一日閭里
間輒數處火起民頗憂懼有巫楊韞因之遂興妖言

曰某日某所復當火皆如其言民由是競禱之懿謂左右曰火如巫言巫為火也宜殺之以息其奸於是命斬韞於市火遂絕貞明中自新定判東陽東陽之南有白砂神郡人畏而奉之每歲三月有大風雨自白砂起郡城或言神本海龍每歲一復東南為怪壞民廬舍及懿臨郡夢朱衣言白砂王奉啟相國今以他適將由郡城且慮驚駭已由南山而去翌日風雨果如之人皆異之頗喜宴遊彫飾之事文穆王襲國

禮敬尤篤懿每飲酒及其半而傾於地文穆王因宴
乃致鈔鑼於懿前意誠其事懿自是遂改累奏授賓
睦二州刺史清海武勝等軍節度使太傅同中書門
下平章事金華郡王終年六十六諡曰宣惠在郡三
十年初懿之為新定有卜士方氏時人號為龜精常
數卜以貽懿曰太乙接大河金華寶貝多郡侯六十
六別處不經過至是果如其言

是月命復王從兄仁俊官爵

壬子二年春二月制授王天下兵馬元帥增食邑二千戶
實封五百戶改賜推誠保德安邦致理忠正功臣夏四
月朔日有蝕之勅衢州刺史王叔元瑣知福州威勝軍
事王弟弘偓為衢州刺史六月乙未王妣吳越國順德
太夫人吳氏薨

夫人錢塘人諱漢月中直指揮使珂女也幼而婉淑
奉文穆王恭穆夫人尤寵愛之夫人善胡琴性慈惠
而節儉頗尚黃老學居常被道士服餘皆布練而已

每聞王決斷政事有及重刑者夫人常頻感以仁恕
為言諸吳將有遷授皆峻阻之及其入對多加訓勵
有過失必面責之故諸吳終夫人之世不甚驕恣勅
封吳越國順德夫人薨年四十諡曰恭懿

秋八月丁酉勅葬恭懿夫人於錢塘慈雲嶺之西原九
月甲寅朔丞相裴堅卒

堅字廷實吳興人父光庭累官至中書令有術士景
歲能言休咎以紙大書台字以貽光庭不旬日果貶

台州刺史大有政聲堅幼明敏善屬文及長有知人之鑒事吳越國有善政條教有方累官禮部尚書中書令拜吳越國丞相終年五十六諡曰文憲

冬十月朗州指揮使

彭言

姓犯武肅王諱改彭城

舉兵逐邊鎬克

復湖南獻捷於朝廷朝廷以為武平節度制置武安等軍事因遷湖南節制府於朗州

癸丑三年春二月湖州所隸建州降卒鄭懷嵩等十一人

以刺史散香於資福寺遂率其黨二百餘人作亂即日

盡誅之三月勅授王起復鎮東大將軍左金吾衛上將軍
負外置同正負王以兄弘儼為温州刺史夏四月建
報恩元教寺於城北薦王妣也王親閱內外諸軍非驍
勇者咸停放之冬十月大閱馬步軍艘艦於碧波亭十
一月命弟弘仰為台州刺史十二月湖南王逵舉兵執
朗州彭城言囚之朝廷尋授王逵湖南節制是歲東陽有
大象自南方來陷陂湖而獲之境內大旱邊民有鬻男
女者命出粟帛贖之歸其父母仍命所在開倉賑卹

甲寅顯德元年春正月丙子朔周主祀園丘改元是月周太祖崩晉王即位是為世宗夏五月辛巳王命鑄王妣恭懿太夫人銅容二致於奉國金地二尼寺秋七月勅遣使加授王天下兵馬都元帥仍賜金印冬十一月勅遣進奏使章思忠歸諭機事航艦不利思忠溺焉是月北漢主殂子鈞立

乙卯二年春二月朔日有蝕之三月制加王食邑一千戶實封四百戶夏四月庚子王親祀五廟秋七月庚午有

虹入天長樓

樓在內城之東

王避寢於思政堂九月王復於天

寵堂閏月丁酉世子惟濬生冬十月乙丑朔勅遣司空

李穀率師伐金陵十二月王遣使入貢勅王出兵會擊金陵是月王師渡淮

丙辰三年春正月車駕東征詔王以國兵分路進討是月

南擊場門樓火金陵李景僭稱唐皇帝致書於京師仍令偽皇太弟璲致書於統師李穀又遣偽宰相孫盛等入貢二月王師入淮南靜海軍制置使姚彥洪率家屬

軍士戶口等一萬餘人奔於我是月王命丞相吳程前
衢州刺史鮑修讓等攻毘陵命都指揮使路彥銖等伐
宣城命都指揮使羅晟等督水師次於江陰應王師也
既而勅遣殿直薛有光來宣諭仍賜沿身衣冠法物三
月我師克常州生擒刺史趙澤偏將諸承向重霸等一
百餘人遂班師

時營田副使陳滿言於丞相吳程曰周師南征舉國
驚擾常州無備易取也吳程如其言請於王從之丞

相元德昭上曰唐大國未可輕舉也若我入唐而周師不至能無慮乎吳程固爭王遂命程取常州

是月金陵遣其偽燕王弘冀復據淮南王命從弟蘇州刺史文奉為應援都統使屯於本州備徵發夏五月乙酉建州刺史陳誨以小船沿溪而下福州指揮使馬進姚章等執於賊未幾誨亦宵遁是月車駕還京師六月王命兄仁俊知福州彰武軍事

周改威武軍為彰武軍史失書秋九月

癸卯王親閱兵於龍山教場冬十月車駕親征壽春是

歲始括境內民丁益師旅也

丁巳四年春正月始議鑄錢三月王師大敗淮人於壽春
夏四月宣諭使薛有光航海歸於京師是月車駕還京
師秋七月庚子王命弟弘信爲衢州刺史八月勅遣諫
議大夫尹日就至賜王生辰御服紅袍二副冬十一月
車駕復東征是月泉州刺史留從効請修貢於京師附
我以聞詔從之

戊午五年春正月丁未前衢州刺史王弟弘偓卒

偓字贊堯文穆王第十二子也母陳氏偓性仁慈事母以恭儉聞及為郡時歲旱部民將逐食於他郡民不忍別偓俱詣郡廳告白而去偓為之流涕其為政寬恕厚重王加友愛尤篤及卒中外無不歎惜終年

二十五

二月丁卯王師復維揚勅遣殿直趙誨來宣諭仍出艫艫於瓜步迎鑾長風涉等處王師欲濟江乃命上直都指揮使邵可遷路彥銖等帥艦四百艘水師二萬以會

之江北諸郡悉平三月王不康丙午勅命翰林學士都承旨陶穀司天監趙修已賜王羊馬橐駝每歲班賜自此始也是月金陵李景復稱江南國主遣偽臨汝郡公徐遼宰相馮延巳奉表稱臣於行在王師乃罷

初金陵之將內附也王亦飛書以諭之既而附我以誠款聞詔從之

夏四月辛酉城南火延於內城王出居都城驛詰旦煙焰未息將焚鎮國倉王親率左右至瑞石山命酒以祝

之曰不穀不德天降之災宮室已矣而倉廩儲積蓋師
旅之備實所痛惜若盡焚之民命安仰天其鑒之乃命
從官伐林木以絕其勢火遂滅即日王見丞相以下罪
已之暇且曰吾旬月所苦尤至而災釁之餘遂覺康裕
中外聞之頓安丁卯王命弟弘儀復為東府安撫使是
月勅遣天下都軍頭周廣來宣諭仍賜邵可遷以下及
將士衣服有差五月辛巳朔日有蝕之唐主去帝號奉
周正朔六月戊寅前台州刺史王弟弘仰卒

仰文穆王第十三子也母周氏仰善騎射通儒術能書寫及為郡吏民畏服性雖嚴急而政事寬簡終年

二十四諡曰成顯

秋八月勅遣閣門使曹彬賜王兵甲旗幟等冬十月乙巳王遷於思政堂是月南漢主殂子鋹嗣

紀六年春二月甲申王遣丞相元德昭寧國軍節度使吳延福入貢京師夏四月車駕親征幽并是月勅陞湖州為宣德軍授王兄弘偁特進檢校太尉充本軍節度

使五月熒惑犯心六月癸巳周世宗崩少主即位秋八月勅加王食邑一千戶實封四百戶仍改賜崇仁昭德宣忠保慶扶天翊亮功臣又勅王元妃孫氏為吳越國賢德夫人王世子惟濬為鎮海鎮東等軍節度副使檢校太保冬十月王重建功臣堂

庚申建隆元年春正月癸巳今大宋皇帝受禪大赦改元封周少主為梁王勅遣使來宣諭二月王但用今名避廟諱也三月甲寅大慶堂成王舊邸也

堂寬高廣大凡一百間命勒碑文以紀其事

夏四月勅授王兵馬大元帥加食邑一千戶實封五百
戶五月昭義軍節度使李筠叛丁巳車駕親征六月甲
午勅加吳越國賢德夫人為賢德順睦夫人又授兩軍
節度副使王世子惟濬金紫光祿大夫檢校太保充節
度使是月勅陞明州為奉國軍授王弟弘億金紫光祿
大夫檢校太保充本軍節度使秋七月庚子潞州平勅
遣通事舍人武懷節來宣諭九月甲寅揚州節度使李

重進叛車駕東征是月王遣上直指揮使孫承佑率師至潤以迎應之庚申王以寧國軍節度使王舅吳延福等有罪並除名配外郡

延福等兄弟五人俱有異圖左右將校勸王誅之王曰吾以先太夫人同氣之故安忍置之於法言訖遂嗚咽垂涕衆皆稱賀於是黜延福等於外郡以全吳氏之族

冬十一月丁未揚州平勅遣通事舍人王繼筠丁德裕

來宣諭仍賜國信庚申勅遣西上閣門副使武懷節來
宣諭甲子王命衢州刺史從弟弘信入貢

自太祖革命王有貢奉即加常數太祖禮之亦異於
常

十二月戊辰車駕還京是月王遷於功臣堂

辛酉二年春二月江南國主李景遷國於豫章三月勅遣
使丁德裕送王弟弘信回仍賜王戰馬二百疋羊五百
口駝二十頭夏六月甲寅豫章李景殂子煜嗣位於金

陵秋七月丁亥昭憲王太后崩遣使來宣告自五月不雨至於是月王命取龍湫於天台山以祈雨九月始權酤冬十二月王命弟弘信復為衢州刺史

壬戌三年春二月勅遣右殿直王著來宣諭仍賜國信夏五月東陽信安新定三郡民災戊辰王遣使賑卹秋七月壬戌大風拔木八月庚寅泉州留從効為大將張漢思所弑漢思自稱權知清源軍事九月庚戌夜所在地震響如雷冬十月庚寅勅遣上殿直景德倫授兩鎮節

度王世子惟濬為邕州建武軍節度使庚子勅遣西上
閣門副使武懷節至以泉州張漢思不稟朝命俾王責
之翌日王遣使往責之漢思遂從命焉

癸亥四年春三月朔日有蝕之是月王師盡取荆湘之地
初番禺衡州刺史張文表侵湖南朝廷援之遂執文
表及班師因取二地荆帥高繼冲潭帥周保權並入
於京師

夏四月丁未泉州張漢思為四門指揮使陳洪進所幽

洪進歸命於王請命於朝遂授洪進平海軍節度使檢校太傅秋九月丁巳重建天寵堂壬申大閱樓艦於西湖賜內外將校服帶有差冬十月甲申獲巨魚於江壩長九丈六尺十一月甲子太祖有事南郊大赦改元乾德王命姪昱入貢勅遣引進使丁德裕來宣諭仍加王食邑一千戶實封四百戶改賜承家保國宣德守道忠貞恭順功臣又加建武軍節度使王世子惟濬檢校太尉十二月孝明皇后崩勅遣使來宣告是月命姪郁為

秀州刺史

甲乾德二年春正月戊寅朔大雨震電二月戊申朔日
有蝕之三月制王落起復天下兵馬都元帥加食邑一
千戶實封四百戶四月重建城南寶塢寺成鑄武肅王
文穆王忠獻王銅容供於寺秋八月庚申王駕復天寵
堂謂丞相以下曰頃以寡德遂貽災釁曾未十年中外
如斯實宗廟之休公等之力然作之者勞吾不敢忘更
賴公等以輔不逮丞相以下咸稱大慶冬十一月王師

伐蜀王乃命親從都指揮使行軍司馬孫承祐等率師會焉

乙丑三年春正月乙酉西川平蜀主孟昶入於京師二月壬寅朔日有蝕之乙丑王命姪台州刺史昱入賀秋七月有虎出於龍山凡傷數十人捕之逾旬而獲八月癸卯重建寶塏寺於城北是月勅遣通事舍人張延通來宣諭仍賜生辰禮物甲寅丞相吳程卒

程字正臣山陰人祖可信定州虞唐縣令父蛻大順

中登進士解褐鎮東軍節度掌書記右拾遺累官禮部尚書程起家校書郎武肅王承制累授檢校戶部員外郎借緋長興初王女將選婚於士族乃以孟榮于葆暨程等三人見於王庭武肅王熟視程乃選之承制遷金部郎中借金紫以程有吏術因命提舉諸司公事文穆王襲國奏授程為職方郎中觀察支使節度判官天福中文穆王子僊遙典睦州命程知州事忠獻王時以程判西府院事尋拜丞相福州李儒貲

伏誅授程威武軍節度使乾祐三年淮人侵福州程授諸軍節度獲其將查文徽初淮人薄閩城授甲於將卒而將卒充溢庭廡紛然不可遏程因登檻瞋目叱之衆皆股栗自是軍政嚴肅程始在東越以父廕不事苦學有謂程曰觀子骨法與羣儒類但恨他日登將相不長談論耳程遂勤學文穆王時有西府院官滕攜嘗夢程化為赤龍望南方而去攜因語其夢於人曰吳氏子非我所測也及為福州始驗其兆

尋以國用繁廣乃命程兼掌屯田權酷事乾德初程
夢一羽人為布策於前計字之筭而所遺者三果三
載而卒年七十三諡曰忠烈

冬十一月王命從叔前知福州彰武軍事元瑱為睦州
刺史姪昱復為台州刺史

丙寅四年春二月乙亥宣德節度使同平章事王兄弘偁
卒

偁字惠達文穆王第八子也母陳氏起家內衙諸軍

都知兵馬使檢校司空年十八出為湖州刺史有妖
巫登衙門大樹恣為鬼神語州人皆驚畏偁曰妖由
人興乃命注弩而射之巫果請命因鞭之州人咸服
偁明吏術能為詩頗有奇句王嗣位恭敬尤篤顯德
中王城災悉以器用服玩上之累奏授特進檢校太
尉宣德軍節度使建隆初勅授同中書門下平章事
終年三十八諡曰恭義先是大星隕於西北月餘而
偁終焉

夏五月丙戌王從兄婺州刺史仁倣卒六月勅授王子
內衙都指揮使惟治為容州寧遠軍節度使金紫光祿
大夫檢校太保九月壬寅王避正寢於功臣堂計都入
須女也癸卯王兄知福州彰武軍事弘儼卒

儼字智仁文穆王第二子也本名弘偁起家上直副
兵馬使檢校尚書右僕射二十餘年為東府安撫使
洞曉政術吏不敢欺文穆王嘉之賜金酒器一副因
命兼領新定性簡儉善騎射能書有文而自晦福州

初歸我將校有仇憾者率多相誣謂左右曰人各有憾一啟之誣構交生人相疑懼豈國家推心懷遠之道也因悉不問閩人莫不感悅尋鎮永嘉愈事清率所蓄聲伎悉放之每食不過鮑魚菰菜而已顯德中嘗因入覲溫人謂其將代乃卧轍阻之僮乃復伺夜出人皆宿於城門詰旦侍妾以籃輦先出衆疑僮在其中遽擁而迴官吏具聞王命示歸期人始從焉溫人舊苦徭役僮乃置簿書以均之民感其惠多為僮

醜本命又俗尚淫祀僇皆鎖其祠宇器玩以充公用
及移鎮無諸溫人有攜家以從者謂之隨使百姓僇
出城日皆行啼巷哭曰願公早回至是以神柩由溫
江歸會稽三郡之民為之號踊凡兩鎮無諸會稽一
鎮永嘉通任二十餘年承制累授檢校太尉拜丞相
終年五十有四諡節惠

冬十一月甲寅命王弟信知婺州武勝軍事

丁卯五年春二月丁卯除睦州刺史元瓚知福州彰武軍

事戊辰王弟奉國軍節度使億卒

億字延世文穆第十子母沈氏初孕文穆王夢僧入
寢帳及生故字曰和尚起家內衙諸軍左右都虞侯
檢校左僕射性俊拔善屬文年二十一出為明州刺
史頗著善政凡科率舊制除出之顯德中王命括民
丁將益軍旅州縣長吏因之多所殘弊億乃手疏之
辭理切直王感悟遂寢其事王嘗與丞相以下論及
時務且言民之勞逸率由時君奢儉因為詩二章以

言節儉之志命億應和億以北方侯伯多獻淫巧乃
因詩以風刺王嘉歎久之仍賜詩以美其意億嘗以
息女許王舅吳氏子而諸吳驕恣日益遂怒之自是
不通時人稱其強正建隆初奏授明州奉國軍節度
使檢校太保未年夢金甲神告其終期因會賓客飲
酒與之訣寢疾三日而終年三十九諡曰康憲

壬申勅祀禹祠於東府己卯王從兄温州刺史仁俊卒
三月五星聚奎

如連珠在降婁之次太平之兆也

是月建武軍節度使檢校太尉王子惟濬入貢而還賞
賜吳越國賢德順夫人珠翠冠帔等夏四月辛巳命王
子寧遠軍節度使惟治兼判奉國軍事秋七月辛亥勅
授王弟儀依前鎮東安撫使金紫光祿大夫檢校太保
冬十月王遣元帥府掌書記黃夷簡入貢是月勅遣使
至賜王生辰禮物十一月辛酉大閱於教場仍宴將帥
戊辰六年春三月乙酉丞相元德昭卒

德昭字明遠撫州南城縣人父仔倡任新撫饒信四州刺史淮南節度使檢校太傅仔倡之在信州也頗傾心於我屬衢睦作叛亦有犄角之力及為淮人所攻其下內叛遂奔於我武肅王禮以賓席惡其本姓危氏乃更曰元因為錢塘郡德昭起家鎮東軍節度巡官錢塘縣令累授睦州軍事判官知台州新亭監始在信州仔倡使日者視諸子日者指德昭曰獨此子非武官及學文其師授以文體文穆襲國命林鼎

為丞相曰元德昭有輔翌之才吾子孫無所憂矣連
掌文翰忠獻王時南閩用師凡兵機細務悉以委之
尋拜丞相王即位禮遇彌至德昭厚重多謀臨事而
不撓每屬嚴整議者盈庭德昭至則他論皆息軍中
有不議理者德昭以事諭之無不聽服性嗜酒雖沉
醉無所怠事晚年衰耗王見之謂左右曰吾向見德
昭容色衰倦必一旦不諱人誰輔我因泣下德昭理
家以孝友聞每時序置酒環列几席者凡四代嘗為

詩云滿堂羅綺兼朱紫四代兒孫奉老翁及寢疾自
為埋文治後事終年七十有八中外無不歎息諡曰

貞正

乙巳建奉先寺於城西薦文考也夏六月戊午蘇州長
洲縣民王安妻產三子秋七月北漢主殂養子繼恩嗣
九月北漢將侯霸榮弑其主而以繼元嗣壬辰福州彰
武軍事元瓚卒

瓚少強直好詩學武及長從征有功屢授是任凡在

麾下畏服嚴明無有敢犯者處兄弟不疑侍文穆及王盡臣禮以此上下和睦卒年六十有七

是月勅遣使賜王生辰禮物冬十月辛酉命世子建武軍節度兩軍副大使惟濬兩浙行軍司馬孫承祐入貢助郊祭也十一月癸卯皇帝南郊大赦改元開寶十二月己酉朔日有蝕之

大宋嘉祐元年丙申歲正月七日四代孫朝奉郎守尚書刑部郎中集賢殿修撰知梓州軍州事兼管內

橋道使提舉戎瀘等七州賊盜甲兵專勾當納溪夷人公事上護軍賜紫金魚袋錢中孚寫

大宋紹興二年壬子歲六月二十七日七代孫迪功郎前河南府儀曹掾錢渙伏覩曾祖修撰所傳吳越備史於蔡子發家遂取而歸復藏吾家焉在臨安府寶蓮山寺題

吳越備史卷四

欽定四庫全書

吳越備史補遺

舊本備史皆止於戊辰年而忠懿之事未終此卷不知作自何人蓋參本傳及秦王貢奉錄家王故事為之或以合於備史今釐正之

開寶二年春正月制加王食邑三千戶實封六百戶是月遼主明辰嗣位秋八月勅遣使至賜王生辰禮物并御衣紅袍一副金鎖甲一副及馳馬一百頭三年春正

月王親饗五廟秋九月王遣子惟濬入貢是月詔王出師伐富州王將起師尋以路遠詔止之四年秋九月勅遣使賜王生辰禮物衣冠劔佩等冬十一月皇帝南郊制加王食邑二千戶實封六百戶仍改賜開吳鎮海崇文耀武宣德守道功臣五年春三月建武軍節度使檢校太尉王世子惟濬貢奉歸賚賜吳越國賢德順睦夫人珠翠冠帔各一副秋九月王遣元帥府掌書記黃夷簡入貢太祖謂夷簡曰汝歸語元帥當訓練兵甲江南

倔強不朝我將討之元帥當助我無信人言唇亡齒寒
王密表謝且請師期冬十月王親饗五廟復謁寶塏寺
拜先王銅容六年秋八月勅遣使賜王玉帶一條御衣
一襲及生辰禮物冬十一月二日大雪雪氣如煙七年
夏五月勅遣進奏使錢文贄賜王襲衣玉帶玉鞍勒馬
各一事金器二百兩銀器三千兩錦繡一千段秋七月
勅詔王取常州

詔曰勅錢俶朕統御萬邦撫臨兆庶推至誠而待物

期率土以歸心布惠行仁是予本志興師動衆非我
願為惟彼江南言修臣禮久被撫綏之化頗傾依附
之心貢封章則惟見恭勤修外貌則多從減降既云
事大每欲包荒甘言嘗信其赤心內稔豈疑其奸計
而又疊傾誠款願降冊封既禮分之未虧故我心之
無間使人頻至詞旨愈專是以特降近臣俾其畧來
赴闕頒宣優厚恩禮殊隆何期終日包藏一旦彰露
不惟多方託故懇避來朝而乃修葺城池選練軍旅

教習戰陣抽點鄉兵為捍拒之謀作攻守之備朝廷
養寇垂二十年心狠貌恭突然自敗向展為臣之禮
適滋觀釁之方每云傾輸動彰狡詐既行問罪須至
興師今者禁衛出軍雲臺選將尅期攻取直抵昇州
卿任重統戎心專蕩寇況早者曾披章奏具述事宜
今驗姦克果符陳請聞茲討伐必罄忠蘆今候丁德
裕到彼住三五日可部領兵士起發且往攻取常州
毘倚之懷寤寐無已故茲詔示想宜知悉

是月王密遣行軍司馬孫承祐入奏機事九月孫承祐
自京賫密詔回師期定矣王即日命境內訓練士卒揀
閱兵甲是月勅遣內客省使丁德裕賜王生辰禮物冬
十月勅授王東南面招討制置使仍賜御劍一口御甲
一副金鞍御馬一疋仍命丁德裕為行營兵馬都監又
以雲騎雄捷等指揮步兵九千人輔王進攻常州是月
庚申王親率鎮國鎮武親從上直等都指揮使王諤等
五萬餘人發自國城丁德裕為先鋒使是日天氣晴和

風色便順癸亥次嘉禾有氣黑色形如覆舟當行府之上占者曰王氣也丙寅王率諸軍入毘陵前鋒所至賊望風而遁有獲巨龜於旌門之下占者曰玄武之應也戊辰王次毘陵遂克關城常人以牙城自守王命營於九僊墩命親從指揮使凌超等分營四門命鎮國都指揮使王諤攻江陰鎮武都指揮使金彥滔攻宜興並率水艦由吳興出太湖而進十一月詔遣弓箭庫使王文寶來宣諭仍賜湯藥以金盒盛封至是月王遷行府於

賊城南門金彥滔克宜興獲其令尉等官士卒凡二百五十人馬八十疋王即命金彥滔獻於京師十二月癸亥王親率軍將攻拔城寨殺賊軍二千餘人生擒六百餘人辛未又敗賊萬餘人於城北金陵大將盧絳宵遁先是城中既危金陵遣大將盧絳率萬人來救至是敗之絳僅以身免

翌日王命鈐轄使沈承禮等並告於京師八年春二月詔遣內直使陳理來宣諭仍以戎服五萬副賜王軍卒

又賜王將帥服帶器帛有差是月王親率大軍攻其壘
不克夏四月我師復大攻城壘時偽知常州軍州事禹
萬誠遣觀察推官鄭簡降款於軍門且請命焉王從其
請禹萬誠等詣行府待罪王賜以衣冠器幣等悉送於
京師以請命又命羊酒置其家以安慰之江陰寧遠等
軍沿江石橋等寨軍兵來降王悉宥之是月勅遣使來
宣諭授王守太師加食邑六千戶實封九百戶仍賜湯
藥及沿身法物等五月詔客省使丁德裕權知常州仍

又遣勅上侍禁李輝賜王襲衣玉帶玉鞍勒馬各一事
金器二千兩銀器一萬兩錦綵一萬段詔王歸國是月
王遣兩浙諸軍都鈐轄使沈承禮等率兵會王師於金
陵

先是毘陵降人凡二千餘口至是悉分還本郡仍表
奏之詔書褒焉

冬十一月我師克金陵僞主李煜出降

是日冬至軍中皆會飲承禮謂諸將士曰城中以我

節序必有讌享備我怠矣宜出其不意以圖之乃召敢死士十人以火攻其城陷其東門士皆賈勇攀壘而上王師覩之亦攻其南煜危迫遂出降焉

是月王乃表賀之復遣大將孫承祐上表請入覲十二月王克金陵有功勅遣東頭供奉官徐靖賫賜王綵錦八對御衣一副金盃一頂金甲一副御酒一百瓶馳馬三百疋仍賜御札一通褒焉又賜王麾下孫承祐為平江軍節度使沈承禮為寧海軍節度使又賜為防禦使

者三人為刺史者六人賞克金陵之功也是月詔許王入覲焉

勅錢俶省所差鎮東軍支使王通今月二十八日走馬到闕奏今月十五日偽命知常州禹萬誠等歸附已安撫城中事具悉卿位高王霸天付將才門專衛社之勲世著勤王之節一昨親提銳旅取彼堅城勢孤而既絕援兵力盡而遂輸降款遽歷寒暄之候遂成克復之功永增史冊之光輝實協君親之任委甚

為嘉賞不捨寐興故茲獎諭想宜知悉

九年春正月庚申王發自國城先是太祖皇帝因王入
覲勅遣供奉官張福貴淮南轉運使劉德言開古河一
道自瓜洲口至潤州江口達龍舟堰以待王舟楫

其堰遂名曰大通堰又於京城之南勅建大第連亘
數坊棟宇宏麗儲什物供帳之類皆御王者賜名曰
禮賢宅以俟王駐節焉

二月辛丑王次寶應勅遣引進使翟守素至賜王湯藥

以金盒盛之又賜金鞍轡馬二疋仍押御厨儀鸞翰林
皆至馬甲辰王次泗州勅遣內臣至賜馬三百疋馳一
百頭以載行李辛亥又遣內司賓洎內臣至賜王夫人
孫氏湯藥二金盒法酒五十瓶茶果五十盒是日次近
畿皇帝詔山南東道節度使興元尹皇子秦王德昭迎
勞仍賜法酒一百瓶子一百盒翌日王至京師詔興
元尹賜宴於迎春苑尋詔王居禮賢宅王未至前數日
太祖幸其宅躬自閱視其恩禮如此戊午王朝見於崇

德殿進賀平江南及允朝覲表貢奉犀玉帶及寶玉金器五千餘事上酒一千瓶遂賜宴於長春殿中席就幄次賜黃金照匣黃金鈔鑼及瓶盤等皆御物也已未王進謝詔宴於後苑丙寅駕幸禮賢宅賜金二千兩銀三萬兩絹二萬疋又賜王世子建武軍節度使惟濬及陪臣通儒學士崔仁冀等絹帛有差是日王遣世子又進通犀帶二條金玉寶器五千事三月制賜王劔履上殿詔書不名進封王夫人孫氏為吳越國王妃封王女為

彭城郡君仍詔內臣賜王妃湯藥法酒茶果等五百餘
事翌日宰臣上言異姓諸侯王無封妻為妃之典上曰
行自我朝蓋旌忠賢何必古也時又詔王宴於苑中獨
太宗秦王侍坐酒酣上命王與太宗秦王叙昆仲之禮
王叩頭陳讓再四翌日太祖將幸洛陽詔王歸國王懇
請隨駕詔不許惟留王子惟濬從行是月王奉辭詔遣
賜金器二千兩銀器一萬兩銀三萬兩對衣玉束帶玉
鞍轡御馬一疋細馬五疋綾羅錦緞共八萬疋戎裝器

八百事散馬一百疋銜墜腰帶絡縫衫等二千事又賜王麾下將帥等官錢帛有差太祖謂王曰南北風土炎暑不同宜加調護卿可早歸又親賜密封包袱一封謂曰卿至途中宜密視之王涕泣進言願三歲一朝上曰川陸迂遠當俟我詔旨即來次日王妃入辭中宮賜金器三百兩衣著二千疋銀二千兩是月甲戌王離京師詔秦王賜晏於迎春苑勅遣引進使翟守素押翰林御厨儀鸞送至睢陽次日又遣入內小底乘驛至賜王湯

藥二金盒王妃湯藥一金盒戊子王在舟中再拜密開
所賜黃袱視之皆羣臣乞留王章疏也

王既入朝文武羣臣屢上疏乞留王太祖知王忠厚
謹慎固不允及王起行時密以賜焉

夏四月丙辰王至國城丙寅王命子惟治詣闕謝恩即
日王視事移座於東偏謂左右曰西北者神京所在天
威不遠顏咫尺某豈敢寧居乎五月太祖郊畢制加王
食邑三千戶實封一千戶秋八月勅遣進奏使汪知杲

至賜國信及生辰禮物冬十月太祖宴駕太宗即位大赦改元太平興國勅詔以封命諭王

以廷美為開封尹封秦王德昭為永興節度封武功郡王德芳為興元尹

又勅遣侍御史雷德驤來告哀王率府僚將校等發哀王二日不食十一日不視事十一月王遣元帥府衙內都指揮使王子惟渲賫通天犀帶一條金器五百事玳瑁器五百事塗金銀香龍等巨萬詣闕以為賀是月勅

遣樞密都承旨武珍制加王食邑五千戶實封一千戶
仍賜龜魚寶帶襲衣等是月吳越國王妃孫氏薨太平興國
二年春二月勅遣給事中程羽來歸王妃之賵謚王妃
曰闕

夏五月王下令以文軌大同封疆無患凡百禦
敵之制悉命除之境内諸州城有白露屋及防城物亦
令徹去之秋八月詔遣翰林學士都承旨李昉賜王生
辰禮物是月王遣兩軍節度使世子惟濬入朝修覲禮
也三年春二月六日王發國城三月二日次揚州勅遣

閣門使梁迥內班閫承翰來賜王湯藥茶酒及押諸司
官迎接七日次洪澤驛勅遣供奉官李思彥至賜王湯
藥一金盒玉鞍轡馬一疋散馬三十疋玳瑁絨毛暖衣
等物及賜從行將校有差十五日王次宿州又遣入內
小底副行首蔡守恩賫詔至仍賜王龍茶三觔以金盒
盛之御酒二十瓶荔枝鵝梨石榴共六百顆以銀裝籠
子盛封十七日王次永城時太宗勅遣王世子兩軍節
度使惟濬迎候以內班李神佑領翰林儀鸞御廚諸司

隨世子至賜御筵一席是日王遣平江節度使孫承祐
自京至傳宣撫問二更閣門使梁迥又至復傳宣撫問
二十四日王至京師勅詔皇太弟開封尹廷美賜宴於
迎春苑仍遣賜王對衣八事玉排方腰帶金器一千兩
銀器一萬細衣三千疋玉鞍轡馬一疋是日王安居於
禮賢宅二十六日朝見於崇德殿謝恩及謝差親王迎
接賜宴於長春殿王進上法酒五百瓶金銀器物三千
兩綾錦一萬龍鳳香等二萬事翌日遣使賜王生料羊

二百口法酒三百瓶粳米二百石雜買錢一萬緡草料
柴炭稱是又賜從行將校等官錢三萬緡二十九日遣
內司賓來賜果子三十盒法酒一百瓶蒸羊食物等十
匱三十日詔王宴於後苑王復進寶玉金銀酒器等三
千兩通犀帶一條龍鳳龜魚帶六事時太宗命射每中
的者即進金銀器三百兩太宗中的者六夏四月八日
詔王宴於崇德殿二十三日宴王於後苑二十六日詔
王宴於南郊御莊王又上酒器金銀器皿等共二千餘

兩王酒酣至暮而歸第次日遣內司賓賜王御衣紅袍一副綵衣六事寶帶一條金酒器三千兩細馬四疋御馬一疋儀鸞一副是日王進拜表謝恩仍請以吳越封疆歸於有司優詔不允

表略曰伏有懇誠貯於肺腑幸因入覲輒敢上言蓋虞神道之害盈必冀天時之從欲臣近蒙賜以劔履上殿詔書不名仍以本道召募卒徒嘗營戈甲特建國王之號并增師律之嚴皆所以假其寵名詫其隣

敵方今幅員無外名數洞分豈可冒居自罹公議合
從省罷以正等威除本道軍甲器已曾奏納外所有
封吳越國王及天下兵馬大元帥職名並乞解罷凡
頒詔命悉願名呼庶聖朝無虛授之恩微臣免速亡
之禍

五月三日遣內使賜王湯藥四金盒金器二百兩銀三
千兩次日王再上言請之

略曰臣慶遇承平之運遠循肆覲之儀宸眷彌隆寵

章皆極斗筭之量實覺滿盈丹赤之誠輒茲披露臣
伏念祖世以來親提義旅尊戴中京略有兩浙之士
田討平四方之僭逆此際蓋隔朝天之路莫諧請吏
之心然而稟號令於闕庭保封疆於邊徼家世承襲
已及百年今者幸遇皇帝陛下嗣守丕基削平諸夏
凡在幅員之內悉歸輿地之圖臣一邦僻在江表職
貢雖陳於外府版籍未歸於有司尚令吳越之民猶
阻唐虞之化太陽委照不及郛家春雷發聲尚為聾

俗則臣實使之然也罪莫大焉願以所部十三州獻
於下執事其地閭里名數別具條析以聞伏望陛下
念奕世之忠勤察乃心之傾向特降明詔允茲至誠
是月六日乃下詔從之

詔曰卿世濟忠貞志遵憲度承百年之堂構有千里
之江山自朕纂臨來修觀禮覩文物之全盛嘉書軌
之混同願親日月之光遽忘江海之志甲兵樓櫓既
悉上於有司山川田土又盡獻於天府舉宗効順前

代所無書之簡編永彰忠烈所請宜依

於是所部州十三縣八十六戶五十五萬七百兵一十一萬五千暨民籍倉庫盡獻於朝帝御崇元殿受之

是月王麾下將佐軍校聞之皆慟哭曰吾王不歸矣勅陞揚州為淮海國制王依前守太師尚書令兼中書改封王為淮海國王食邑一萬戶實封一千戶仍充天下兵馬大元帥仍改賜寧淮鎮海崇文耀武宣德守道功臣以王弟弘儀弘信並為觀察使以王子惟濬惟治

並為節度使十三日賜王淮海國王金印一面仍賜禮
賢宅為永業十五日又授王子惟演惟灝及未官者子
弟并麾下將校孫承祐沈承禮並為節度使等官有差
又賜賓幕宰相而下拜官者又二千五百人二十三日
詔王宴於長春殿至暮歸第六月四日詔王宴於後苑
命世子惟濬侍坐泛舟於宮池十五日遣入內小底賜
王湯藥四金盒對衣四事八寶玉帶二條法酒一百瓶
二十四日詔王宴於御莊秋七月命京城張燈於王宅

第前後賜設燈山陳樂聲以寵之十八日詔王宴於崇德殿命世子惟濬侍坐焉二十六日遣使至王第慰問仍賜茶藥一金盒八月六日詔王總麻以上親並赴闕授以官爵九日命以杭州伶人馬迎恩等四十五人賜王俾備旦夕宴樂十四日詔王宴於後苑泛遊宮池二十四日遣內使賜王生辰禮物九月九日詔王大宴於長春殿歡樂終日二十日王忽染風疾太宗傳宣旦夕遣使撫問二十五日又遣內司賓賜王茶果湯藥等冬

十月七日王進朝謝賜宴於後苑十一月朔太宗南郊禮畢詔加王食邑二千戶實封一百戶十二月八日遣使賜王蒸羊食物茶果等共十二匱法酒一百瓶二十五日詔王宴於長春殿至暮歸第特輟御前二大燭送馬

卯四年春二月朔王入朝賀大宴於苑中太宗顧王甚厚飲必命醕王大醉及罷拜不能興太宗仍以金裘擔子送王歸第仍以賜之是月車駕征太原王請從行翌

日詔中使別押諸司供帳御厨從王每旦夕傳宣撫諭
錫賚殆無虛日王小心畏慎每晨趨闕蚤先至宮門假
寐以待一日夜漏四鼓清蹕啟行時風雨大作諸節鎮
無一人至者太宗見王與世子惟濬稱歎久之謂王曰
卿中年宜避風冷自今入見不須太早仍輟御前四大
燭賜焉又召王旦夕宴飲一日中頓賜王從官酒食再
賜衛士羊肩卮酒觀其飲啖太宗見其雄壯因顧王王
進曰正所謂如虎如貔如熊如羆上大悅翌日會劉繼元

降上御連城臺誅軍中先亡命於太原者時大臣皆侍坐太宗顧謂王曰卿能保全一方以歸於我兵不血刃深可嘉也仍賜紅袍一副玉鞍轡馬一疋細馬二疋又賜世子惟濬細馬一疋綵衣一副秋七月車駕凱旋大行封賞中書進擬加王食邑一萬戶實封一千戶以麻卷入御筆改增加王二萬戶實封二千戶是月二十六日王入朝賀進金銀器三千兩錦綺二百疋即宴王於苑中又命世子惟濬侍坐八月二十四日遣中使賜王

生辰禮物冬十月六日遣內使賜王法酒二百瓶御食
八匱十一月十二日宴王於長春殿十二月十九日詔
王宴於崇德殿酒酣至暮歸第五年春正月太宗御朝
元殿受朝賀時王以劒履升殿觀者榮之三月清明節
太宗御大明殿召王乘馬擊毬凡五籌仍以毬杖引毬
以授王俾王擊之是日宴於殿廡飲必唱籌願謂王曰
卿中年宜以此娛沉今清明令節宜加調護王啟陳謝
夏四月一日王以風疾告假遣御籌中使一日三至第

仍賜湯藥茶果間日一至六月三日車駕親幸禮賢宅
撫慰再四仍賜金器一千兩錢一萬索銀一萬兩綾絹
一萬疋王遣子惟治進謝秋八月十一日車駕又臨撫
慰親賜湯藥二金盒二十三日遣中使賜王生辰禮物
九月十一日王進朝謝於崇德殿復上金裘定器二千
事水晶瑪瑙寶裘器皿二十事珊瑚樹一株冬十月二
十一日詔王宴於朝元殿至暮又以金裘肩輿送王歸
第仍以賜焉又以御前二大燭前導十一月戊午駕幸

大名府王請從駕詔許賜王肩輿從行七日太宗獵於城之東時風寒頗嚴令中使傳宣俾王先回是月二十日車駕還京六年春正月王風恙復作遣尚醫中使駱驛而至自是賜王免朝二月太宗南郊禮畢制加王食邑一萬戶實封一千戶夏五月王尚在風疾遣中使以紫白水晶碁子盛以金盒雜寶文楸碁枰賜王且諭曰朕萬機之暇頗留意卿疾未痊宜用此自怡一曰內臣趙海常被酒詣王府第將吏以為傳詔者亟稟於王

即進寢室見之海因問王疾何如王曰足疾已久沉痾
今又加之風眩海探懷中出藥百粒以奉王時王方命
茶盡餌之諸子孫及左右惶懼憂駭計無所出海既去
家人皆泣蓋有所疑也王笑曰主上待我甚厚中貴必
良藥也翌日太宗聞之大驚即遣中使撫慰乃杖海脊
二十桎梏坐海於王第門者三日然後流於海島王遣
世子惟濬陳謝太宗撫問久之又賜湯藥一金盒六月
十一日王復貢黃金三千兩白金二萬兩秋八月二十

四日遣內使賜王生辰禮物翌日駕幸禮賢宅王疾尚未痊出迎拜不能興太宗親曳之撫問再四王侍坐進茶太宗仍賜細茶果二十盒祛風法酒二十瓶又賜王子以下絹帛有差冬十月一日王朝謝於文德殿太宗大悅攜手撫問良久遂賜宴於長春殿謂王曰卿恙少可天氣嚴寒宜避風冷自後免入朝王稽顙陳謝十二月三日遣中使賜獸炭一千擔柴米稱是七年春三月太宗貶秦王廷美為西京留守夏四月王風疾復發太

宗遣中使慰問賜王湯藥一金盒又遣入內小底以龍
鳳簫笛娛王終日秋八月二十四日遣中使賜王生辰
禮物翌日王遣子惟灝進謝貢金銀器二百五十兩八
年春正月十三日遣中使賜王珍珠寶燈一座仍命坊
市張燈於王第前後俾王怡悅三月三日詔加王食邑
二千戶實封五百戶夏五月遣內使賜王珍珠黃羅傘
一龍香涼茶二十觔秋八月二十三日遣使賜王生辰
禮物翌日王遣世子惟濬貢上白龍腦香一百觔金銀

陶器五百事銀二萬兩黃金一千兩冬十一月王以天下無事兵革偃息乃讓大元帥及國封表上但許罷兵柄其國封如故仍加王食邑三千戶實封五百戶十二月六日遣中使賜御筵一席以儀鸞迎送王第近代無比雍熙元年春二月二日上幸太乙宮路由禮賢宅王力疾出見於道旁上駐輦撫諭至於再三及駕還命取他路歸遣中使諭王恐煩迎接徑由他路歸矣夏四月十三日遣中使賜湯藥二金盒秋八月二十三日遣中

使賜王生辰禮物冬十月華山陳搏號希夷先生謁王
王問先生得養玄默之道搏曰山野之人何知神仙黃
白之術也十二月十一日太宗郊裡禮畢進封王為漢
南國王加食邑二千戶實封四百戶仍改賜寧海鎮國
崇文耀武宣德守道功臣二年春正月太宗以王善於
草隸遣中使取王草書筆迹王以風恙手不能握筆命
將往時所書絹圖草字遣世子惟濬同中使以進下詔
獎諭仍賜金匣玉硯一副龍鳳墨一百錠紅綠筆一千

管盈丈紙二百軸細白絹三百疋幕府宰相洎朝中大臣文士撰恩賜漢南國王金匣玉硯詩文進上觀覽命黃絹圖本遣賜王夏四月召王宴於後苑帝曰春氣暄和萬物暢茂四海安寧朕當以天下之樂為樂宜令賞花賦詩五月駕幸禮賢宅撫慰久之又命王取平日所書隸書觀看太宗大悅收取數幅翌日遣中使賜王御筆二百枝龍墨二十錠紅袍一副秋八月二十三日遣中使賜王生辰禮九月九日召王扶疾宴於崇德殿是

日楚王元佐廢為庶人

元佐太宗長子也聰敏鍾愛之因力救秦王廷美貶不解遂發狂會重九宴諸王元佐以新瘥不預諸王歸過元佐遂恚曰是棄我也因夜縱火燒其宮太宗怒詔廢之

冬十月遣內使賜王夫人龍鳳珠冠一頂金三百兩銀二千兩十一月十五日遣中使賜王幕府將校幣帛又加授王子惟治等九人官爵有差三年春二月太宗以

王疾未痊詔免入朝改封南陽國王仍賜領南陽節鉞
加食邑二千戶實封一千戶麻降王復抗表陳讓國事
表四上四月王將赴南陽詔免入辭賜御衣一副襲衣
玉束帶一條金器一千兩玉石器皿一百事銀器一萬
兩仍詔山南東道節度使王子惟濬送王至尉氏縣詔
雍州團練使王子惟渲韶州刺史王子惟灝並從王行
是月二十六日王發京師詔遣中使賜御酒二百瓶龍
茶二百觔櫻桃二金盒仍遣中使押翰林儀鸞御厨送

王五月王遣子惟灝詣闕謝恩貢上鰲山寶樹一座紫
金獅帶一條金銀器皿共一萬兩太宗撫問再四六月
太宗命韶州刺史王子惟灝歸加王食邑五千戶實封
三百戶仍賜國信湯藥二金盒茶餅二十匱寶帶一條
金器一千兩銀裘器皿稱是又賜王子惟灝銀二百兩
秋八月王不康勅遣東頭供奉官高品尚醫李密并王
孫相繼而至又遣中使王首宿至賜王生辰禮物仍令
撫問四年春二月勅遣給事中崔灝改封王為許王加

食邑一萬戶實封二千戶仍改賜安時鎮國崇文耀武
宣德守道功臣端拱元年春正月太宗藉田大赦改元
二月勅遣中使進王為鄧王加食邑一萬戶實封三千
戶三月王遣子惟治表賀貢上金飾玳瑁器皿五百事
玉器二十事水晶盤四事金二千兩銀二萬兩錦綺二
萬疋羊二百口法酒二百瓶以為賀禮夏四月太宗命
王子惟治歸賜王御羅袍玉帶瑪瑙嵌珍珠酒器八對
又輟御前金燭臺一對以賜焉秋七月王復不康太宗

聞之勅遣中使王守文翰林醫官王佑洎王諸孫駱驛而至仍又勅遣供奉官詔加王食邑三萬戶實封五千戶仍賜撫問及賫御藥一金盒八月王疾稍痊遣子團練使惟渲詣闕謝恩貢上黃犀帶一大玉帶四金飾酒器一千事黃絹草書八幅隸字四幅太宗撫問再四是月勅遣皇城使李惠河州團練使王繼恩同王子惟渲賜王生辰禮物國信至王扶疾拜命與來使燕接極歡二十三日晡時王於寢齋之西軒命左右讀唐書數篇

又命諸子孫誦調章詩叶數篇未訖忽風恙復作四鼓而薨是夕大流星墜於正寢之上光燭滿庭

王以天成四年八月二十四日四鼓而生復以端拱元年八月二十四日四鼓而薨以生記薨實周一甲子矣

即日王繼恩先還京報訃太宗聞之哀悼不已詔廢朝七日復勅王繼恩押入內班賈繼勳護喪歸於京師冬十月二十四日王喪發南陽十一月二十二日至京師

太宗復發哀詔權窆於城東別墅即日命有司致祭翌日遣中使賞御筵一席致獻於王喪次前二十五日太宗御文德殿命工部侍郎郭贇追冊為秦國王太常定謚曰忠懿二十八日復遣工部侍郎郭贇致祭於喪次十二月十八日遣中使獻茶湯於喪次二年春正月丁酉日遣使押翰林儀鸞鹵簿鼓吹葬王於河南府洛陽縣賢相里陶公原命大臣以下俱素服送三十里仍命有司撰碑文王任太師尚書令兼中書令國王凡四十

年為元帥三十五年窮極富貴福履之盛近代無比王性儉素自奉尤薄常服大帛之衣帷帳裊褥皆用絢絹紮絕食不重味稟性謙和未嘗忤物在藩日每有朝廷使至接奉勤厚進貢之物制作精妙將遣使必列陳於庭北面焚香再拜而遣之廢王嘗於山亭擊鼓聲聞於外守衛者遽以聞王王曰吾兄以閒適為懷非鼓樂不歡乃命裒金魚水鼓四面奉之國人聞之感王孝友有出涕者由是廢王無憂廢之恨終以疾卒太平興國中

趙普再入相盧多遜罷為兵部尚書一日普召王世子
惟濬至謂曰朝廷知盧多遜求取元帥財物極多今未
鞫効者恐累元帥耳請具所遣之物列狀上之惟濬歸
白王王曰主上英明凡大臣有過即自行何用狀上惟
濬懼普因與僚吏等再三堅請曰若不預言事恐不測
王曰且姑休矣我當取案籍考視之於時盡取當時簿
籍命火焚之即召惟濬等至謂曰我入朝之初荷蒙主
上殊常之遇故左右大臣咸有饋物非獨盧相也豈可

見人將溺而加石焉汝等少年慎勿為此禍福我自當之惟濬等惕懼而退普聞之召惟濬至深自歎服稱王寬洪大度事遂寢王博覽經史手不釋卷平生好吟詠在國中編三百餘篇目曰政本國相元德昭翰林學士陶穀皆撰序後文僖公搜尋遺墜總集為十卷撰後序行於世時天禧四年文僖公忝機衡之命特詔尊王為尚父王自國初供奉之數無復文案今不得而書唯太祖太宗兩朝入貢記之頗備謂之貢奉錄今取其大者

如赭黃犀帶龍鳳龜魚仙人鰲山寶樹等通犀帶凡七十餘條皆世希之寶也玉帶二十四紫金獅子帶一黃金九萬五千餘兩銀一百一十萬二千餘兩綾羅錦綺二十八萬餘疋色絹七十九萬七千餘疋金飾玳瑁器一千五百餘事水晶碼碯玉器凡四千餘事珊瑚樹一高三尺五寸金銀飾陶器一十四萬事金銀飾龍鳳船舫二百艘銀裝器械七十萬事白龍碯二百餘斤王自入朝至歸國復入朝太祖太宗所賜金器并金物六萬

四千七百餘兩銀器四十萬八千八百餘兩玉石器四
一萬七千事實寶玉帶四十二條錦綺羅紈一十六萬六
千三百餘疋御衣并袍襲衣等金盃六頂甲六副金玉
鞍轡御馬一十六疋細馬四十八疋馳三百餘疋散馬
二千七百二十疋金印四顆玉冊二御劍三口法酒三
千餘瓶衛墜腰帶三千事鳳冠四頂他物稱是

吳越備史補遺